

Na osnovu člana 13. Zakona o reviziji privatizacije državnog kapitala u privrednim društvima i bankama („Službene novine Federacije BiH“, br. 55/12), direktor Agencije za reviziju privatizacije putem Vlade Federacije Bosne i Hercegovine, Parlamentarnoj komisiji Federacije Bosne i Hercegovine i Parlamentu Federacije Bosne i Hercegovine dostavlja,

## **INFORMACIJU O IZVRŠENIM REVIZIJAMA PRIVATIZACIJE DRŽAVNOG KAPITALA PRIVREDNIH DRUŠTAVA I BANAKA U FEDERACIJI BOSNE I HERCEGOVINE ZA PERIOD NOVEMBAR 2015. GODINE – JUNI 2016. GODINE**

### **UVOD**

Agencija za reviziju privatizacije u Federaciji Bosne i Hercegovine (u daljem tekstu: Agencija) djeluje kao samostalna institucija u Federaciji Bosne i Hercegovine, čija je djelatnost propisana odredbama člana 7. Zakona o reviziji privatizacije državnog kapitala u privrednim društvima i bankama („Službene novine Federacije BiH“, broj 55/12) u daljem tekstu (Zakon).

Na osnovu člana 13. Zakona, Agencija je dužna svakih šest mjeseci putem Vlade Federacije Bosne i Hercegovine informirati Parlamentarno povjerenstvo Federacije Bosne i Hercegovine, Parlament Federacije Bosne i Hercegovine o izvršenim revizijama privatizacije državnog kapitala privrednih društava i banaka u Federaciji Bosne i Hercegovine.

Agencija ima svojstvo pravnog lica.

Sjedište Agencije je u Sarajevu, Ulica Ustanička 11, Ilidža.

Organizacija, upravljanje i rukovođenje Agencijom uređuje se Uredbom i drugim općim aktima Agencije, u skladu sa Zakonom.

Ostvarenje planiranih zadataka izvršit će se u skladu sa Zakonom, a oni se odnose na zaštitu prava građana utvrđenih Ustavom Federacije Bosne i Hercegovine državne svojine u procesu privatizacije u Federaciji Bosne i Hercegovine i javnog interesa zaštićenih vrednota, ukupnog pravnog poretka, javnog morala te postizanja ciljeva propisanih odredbama člana 4. Zakona o reviziji privatizacije na način da se utvrdi je li u postupku privatizacije došlo do povrede odredbi Zakona o privatizaciji.

### **STRATEŠKI CILJEVI**

Agencija je u okviru svojih zakonskih ovlasti i obaveza djelotvornog i brzog izvršavanja povjerenih joj zadataka, utvrdila tri ključna strateška cilja koja će joj pomoći u realizaciji ostvarenja njezinih ciljeva:

<b>Strateški ciljevi</b>		
Uposliti revizorsko i administrativno osoblje koje ispunjava uslove za obavljanje poslova iz njene nadležnosti, u skladu sa posebnim uslovima utvrđenim Pravilnikom o unutrašnjoj organizaciji radnih mjesta Agencije.	Izvršiti profesionalno i odgovorno proces revizije privatizacije privrednih društava i banaka za navedenu godinu spram finansijskih sredstava i raspoloživosti ljudskih resursa, a u skladu sa Zakonom o reviziji privatizacije državnog kapitala u privrednim društvima i bankama.	U toku revizije privatizacije, a u skladu sa zakonskim obavezama, izvještavati Vladu FBiH, Parlament Federacije BiH i cjelokupnu javnost o procesima revizije u vidu izvještaja (polugodišnjih, godišnjih i završnog izvještaja).

## **REALIZACIJA PLANSKIH AKTIVNOSTI AGENCIJE ZA 2015. GODINU**

U toku 2015. godine, od početka marta, kada je sa radom počeo jedan revizorski tim (dva revizora), završene su 3 revizije (Privredna društva: „Dita“ d.d. Tuzla; „Feroelektro“ d.d. Sarajevo i „Hotel Holiday“ d.d. Sarajevo). Agencija akcenat stavlja na činjenicu da se realizacija usvojenog Plana izvršavala sa minimalnim brojem zaposlenika u odnosu na broj za koji je Agencija imala saglasnost i od onog broja planiranog predviđenom sistematizacijom. Za posmatrani period 2015. godine (novembar – decembar) radilo se na reviziji privatizacije započetih privrednih društava.

U daljem tekstu slijedi prikaz i postupak revizija navedenih društava:

### **1. Privredno društvo „Dita“ d.d. Tuzla**

Početak marta 2015. godine, revizori su pokrenuli postupak revizije privatizacije privrednog društva „Dita“ d.d. Tuzla. Na navedenoj reviziji radilo se oko tri mjeseca, Nacrt izvještaja je dostavljen Upravi Privrednog društva na očitovanje, što je zakonski zastupnik i učinio, a zatim je zaključena revizija navednog privrednog društva i donijet konačan Izvještaj sa Rješenjem, te isti poslan prema nadležnim organima kao i Tužilaštvu TK i Pravobranilaštvu Tuzlanskog kantona na daljnje postupanje. Također, o provedenoj reviziji je upoznata i Vlada TK, jer je ista bila nadležna kod privatizacije društva „Dita“ d.d. Tuzla.

Na Rješenje i Izvještaj uložena je žalba od strane Kantonalne agencije za privatizaciju Tuzla. Povodom navedene žalbe drugostepeno tijelo Vlade F BiH, poništilo je Rješenje Agencije za reviziju privatizacije F BiH, te isto vratilo prvostepenom organu na ponovni postupak. U ponovljenom postupku prvostepeni

organ je ponovno donio Rješenje o izvršenoj reviziji privatizacije „Dita“ d.d. Tuzla i isto uputio prema nadležnim organima. Međutim, na navedeno Rješenje doneseno u ponovljenom postupku, žalbe su uložene od strane Agencije za privatizaciju F BiH, kao i od strane Kantonalne agencije za privatizaciju Tuzla. Postupajući po pomenutim žalbama drugostepeni organ je ponovno poništio rješenje prvostepenog organa i isto dostavio prvostepenom organu na ponovno odlučivanje. Agencija za reviziju privatizacije u F BiH, je takvim postupanjem dovedena u situaciju da po treći put vrši reviziju privatizacije privrednog društva „Dita“ d.d. Tuzla, što je u konačnici i učinjeno, te je postupajući po uputama drugostepenog organa Agencija ponovno donijela (po treći put) Rješenje o izvršenoj reviziji pretvorbe i privatizacije „Dita“ d.d. Tuzla. Međutim, na navedeno rješenje ponovno je uložena žalba od strane Agencije za privatizaciju F BiH i Kantonalne agencije za privatizaciju Tuzla, koje su shodno Zakonu dostavljene drugostepenom organu na odlučivanje. Trenutno je u fazi postupak po žalbi Agencije za privatizaciju F BiH i KAP TK, uloženoj na rješenje Agencije.

## **2. Privredno društvo „Feroelektro“ d.d. Sarajevo**

Rješenje o pokretanju postupka revizije privatizacije privrednog društva „Feroelektro“ d.d. Sarajevo, doneseno je 02.04.2015. godine.

Zbog obimnosti cijelog slučaja (vođenje dugogodišnjih upravnih sporova i upravnih postupaka), te izuzimanja tražene dokumentacije kao i godišnjih odmora relevantnih institucija (sud i tužilaštvo), dana 19.10.2015. godine, završen je Nacrt izvještaja, te je isti proslijeđen Upravi Društva na očitovanje. Uprava društva je Zamolbom tražila dodatni rok za izjašnjenje na dostavljeni Nacrt izvještaja o izvršenoj reviziji pretvorbe i privatizacije, te je Agencija postupajući po Zamolbi Upravi Društva ostavila dodatni rok za izjašnjenje. Međutim, obzirom da Uprava Društva nije u ostavljenom roku dostavila Izjašnjenje/Komentar na dostavljeni Nacrt izvještaja, Agencija za reviziju privatizacije u F BiH je dana 22.12.2015. godine donijela Rješenje o izvršenoj reviziji pretvorbe i privatizacije „Fereolektro“ d.d. Sarajevo, sa Izvještajem u prilogu istog, koje je uputila svim subjektima iz člana 17. Zakona o reviziji privatizacije u F BiH. Na predmetno Rješenje žalbu je uložila Agencija za privatizaciju u F BiH, a istu žalbu je Agencija za reviziju privatizacije u F BiH, prosljedila drugostepenom organu na odlučivanje. Rješenjem drugostepenog organa (Stručno tijelo Vlade F BiH) poništeno je prvostepeno Rješenje o izvršenoj reviziji pretvorbe i privatizacije „Feroelektro“ d.d. Sarajevo koje je donijela Agencija. Drugostepenim rješenjem odlučeno je da se u konkretnom slučaju radi o presuđenoj stvari (res iudicata), jer je shodno presudi nadležnog suda raskinut kupoprodajni ugovor i predmet privatizacije vraćen Federaciji BiH. S tim u vezi, Agencija postupajući prema uputama drugostepenog organa okončala je svoje aktivnosti po ovom predmetu.

## **3. Privredno društvo hotel Holiday Sarajevo HTD „Sarajevo“ d.o.o. Sarajevo**

Dana 14.09.2015. godine, pokrenuta je treća revizija privatizacije privrednog društva hotela Holiday Sarajevo HTD „Sarajevo“ d.o.o. Sarajevo. Dana 15.02.2016. godine izrađen je Nacrt izvještaja o izvršenoj reviziji pretvorbe i privatizacije privrednog društva hotela Holiday Sarajevo HTD „Sarajevo“ d.o.o. Sarajevo, koji je shodno Zakonu, upućen na očitovanje Upravi Društva – stečajnom upravitelju na očitovanje. U ostavljenom roku postupajući stečajni upravitelj dostavio je Komentar/Očitovanje na dostavljeni Nacrt izvještaja, koji je ova Agencija razmotrila. Uzimajući u obzir relevantne navode iz dostavljenog Komentara, Agencija je sačinila Rješenje o izvršenoj reviziji pretvorbe i privatizacije privrednog društva hotela Holiday Sarajevo HTD „Sarajevo“ d.o.o. Sarajevo sa Izvještajem u prilogu, koje je shodno članu 17. Zakona dostavila nadležnim organima. Na navedeno Rješenje žalbu je uložila Agencija za privatizaciju u F BiH, koju je Agencija za reviziju privatizacije u F BiH, dostavila dugostepenom organu na odlučivanje. Rješenjem drugostepenog organa poništeno je prvostepeno Rješenje ove Agencije o izvršenoj reviziji pretvorbe i privatizacije privrednog društva hotela Holiday Sarajevo HTD „Sarajevo“ d.o.o. Sarajevo, jer se radi o res iudicata (presuđenoj stvari), obzirom da je između postupajuće Agencije i kupca privrednog društva hotela Holiday Sarajevo HTD „Sarajevo“ d.o.o. Sarajevo prethodno spora za raskid kupoprodajnog ugovora, potpisana sudska nagodba kojom su ugovorne strane poravnale svoja međusobna dugovanja i potraživanja. Postupajući prema uputama drugostepenog organa Agencija je okončala svoje aktivnosti na ovom predmetu.

## **PLAN RADA ZA 2016. GODINU**

Odlukom Vlade Federacije Bosne i Hercegovine V. broj: 229/2016 od 02.02.2016. godine, usvojen je Plan rada za 2016. godinu, kojim je planirano 5 (pet) privrednih društava koja treba revidirati, a rađen je u skladu sa trenutno zaposlenim revizorskim osobljem (dva revizora za privredna društva), i bazirao se na činjenici da je za jednu reviziju potrebno od 2,5 do 3 mjeseca aktivnog rada.

U novembru 2015. godine, Agencija je putem Vlade Federacije Bosne i Hercegovine prosljedila Parlamentu FBiH Informaciju o izvršenim revizijama privrednih društava i banaka. Predstavnički dom Parlamenta FBiH na svojoj 7. redovnoj sjednici održanoj 03.02.2016. godine, prihvatio Informaciju za period mart-oktobar 2015. godine i svojim Zaključkom naložio Vladi Federacije Bosne i Hercegovine da pristupi izmjenama i dopunama Zakona o reviziji privatizacije državnog kapitala u privrednim društvima i bankama (u daljem tekstu: Zakon) i da iz moratorija na zapošljavanje izuzme Agenciju i uposli šest revizora.

Dom naroda na svojoj sjednici održanoj 12.05.2016. godine, nije prihvatio Informaciju, jer prilikom glasanja, Informacija nije dobila potrebnu većinu glasova, a takođe je identičnim Zaključkom kao i Predstavnički dom Parlamenta, naložio Vladi Federacije Bosne i Hercegovine izmjene i dopune Zakona te prijem revizorskog osoblja.

Poslije donesenih Zaključaka od strane Parlamenta FBiH, Agencija je Vladi Federacije Bosne i Hercegovine dostavila prijedlog Zaključka o davanju saglasnosti za prijem uposlenika revizorskog osoblja.

Vlada Federacije Bosne i Hercegovine, je na svojoj 56. sjednici, održanoj 03.06.2016. godine, donijela Zaključak V.broj 1196/2016 od 03.06.2016. godine, kojim izuzima Agenciju iz moratorija na zapošljavanje sa dopuštenjem da nastavi započetu konkursnu proceduru raspisanu početkom marta 2015. godine, koja je obustavljena zbog moratorija Vlade Federacije Bosne i Hercegovine na zapošljavanje u federalnim institucijama i uposli 6 (šest) revizora.

Vlada Federacije Bosne i Hercegovine, zadužila je Agenciju za realizaciju navedenog Zaključka.

Nakon donesenih Zaključaka od strane domova Parlamenta FBiH, Agencija se dana 26.05.2016. godine, zahtjevom obratila Ministarstvu industrije, energetike i rudarstva, za poduzimanje aktivnosti vezano za izmjene i dopune Zakona o reviziji privatizacije privrednih društava i banaka.

## **RAD NA REVIZIJI PRIVATIZACIJE**

Odgovornost revizora je sačiniti Izvještaj o obavljenoj reviziji pretvorbe i privatizacije privrednog društva na osnovu utvrđenog činjeničnog stanja. Postupci revizije započinju donošenjem Rješenja o otpočinjanju revizije, te slanje svim relevantnim stranama dopisa za prikupljanjem dokumentacije potrebne za proces revizije.

Najveći dio podataka i dokumenata prikuplja se od Federalne Agencije za privatizaciju i kantonalnih agencija za privatizaciju, Agencije za bankarstvo, kod privrednih društava i banaka kod kojih će se obaviti revizija, te od ostalih relevantnih institucija i organa koji su učestvovali u procesima privatizacije. Revizija je vršena u skladu sa Zakonom o reviziji privatizacije državnog kapitala u privrednim društvima i bankama ("Službene novine Federacije BiH", broj 55/12), i Zakonom o reviziji institucija u Federaciji Bosne i Hercegovine ("Službene novine Federacije BiH", broj 22/06). Postupak revizije proveden je u skladu sa revizorskim standardima Međunarodne organizacije vrhovnih revizijskih institucija – INTOSAI ("Službene novine Federacije BiH", br. 30/11 i 62/14) i Etičkim kodeksom profesionalne etike revizora.

Djelujući u tom smjeru, sprovodile su se sljedeće aktivnosti:

- odlazak i održavanje sastanaka sa predstavnicima pomenutih Agencija, ministarstvima (premijerima i ministrima);
- saradnja sa Komisijom za vrijednosne papire,
- održavanje sastanaka sa predstavnicima privatiziranih preduzeća,

- svakodnevno udovoljavanje i održavanje sastanaka sa zainteresiranim licima povodom privatizacije odnosnih preduzeća (načelnici općina, općinska vijeća, sindikati, radnici)
- pružanje informacija medijima, povodom pokrenutih revizija i informisanje o istim.

U tekstu koji slijedi, prikazan je pregled pokrenutih revizija u 2016. godini

### **1. Privredno društvo „Vranica“ d.d. Sarajevo**

Početak februara 2016. godine, tj. 08.02.2016. godine, donošenjem Rješenja o pokretanju revizije privatizacije privrednog društva „Vranica“ d.d. Sarajevo, počelo se sa realizacijom usvojenog Plana rada za 2016. godinu. Na navedenoj reviziji radilo se oko 5 mjeseci, Nacrt izvještaja dostavljen je Upravi društva na izjašnjenje.

U ostavljenom roku Uprava Društva – stečajni upravitelj je dostavio Komentar na prethodno dostavljeni Nacrt izvještaja o izvršenoj reviziji pretvorbe i privatizacije GP „Vranica“ d.d. Sarajevo. U Komentaru se predlaže da se na strani 57 Nacrta u tabeli - bilansne pozicije, u zadnjoj koloni, brišu upisani podaci - stanje na dan 12.04.2012. godine, a umjesto njih upisu podaci iz početnog bilanca stanja na dan 13.04.2012. godine, jer je 13.04.2012. godine zadnji dan poslovanja prednika stečajnog dužnika, nakon čega počinje poslovanje u stečaju.

Prema navodima stečajnog upravitelja podaci u početnom bilansu stanja na dan 13.04.2012. godine su konačni jer su utvrđeni nakon završenog sudskog postupka ispitivanja svih prijava potraživanja povjerilaca „Vranica“ d.d. Sarajevo, te je ovaj bilans predat u AFIP.

U prilogu Komentara dostavljena je i kopija početnog bilansa stanja na dan 13.04.2012. godine.

Na ostali sadržaj Nacrta izvještaja Uprava društva i Stečajni upravnik nisu imali nikakvih komentara niti prijedloga.

Revizori su uzeli u obzir navode iz komentara na Nacrt izvještaja, te je shodno navedenom izvršena ispravka podataka na strani 57. u tabeli - bilansne pozicije u zadnjoj koloni - stanje na dan 12.04.2012. godine je brisano, a upisani su podaci iz početnog bilanca stanja na dan 13.04.2012. godine, koji su dostavljeni u prilogu Komentara.

Nakon izvršenih neophodnih ispravki iz prethodnog stava izrađeno je Rješenje o izvršenoj reviziji pretvorbe i privatizacije GP „Vranica“ d.d. Sarajevo, te Konačan izvještaj o izvršenoj reviziji pretvorbe i privatizacije GP „Vranica“ d.d. Sarajevo.

U dispozitivu navednog rješenja navodi se da je GP „Vranica“ d.d. Sarajevo pravilno provelo pravni postupak vlasničke transformacije, shodno Zakonu o prometu i raspolaganju društvenim kapitalom ("Službeni list SFRJ", br. 84/89 i 46/90).

Postupak privatizacije GP „Vranica“ d.d. Sarajevo obavljen je u skladu sa članom 2. Zakona o privatizaciji preduzeća („Sl. Novine Federacije BiH“, br. 27/97, 8/99 i 32/2000, članom 79., stav 1. i 2. Pravilnika o postupku prodaje imovine i dionica ili udjela preduzeća („Sl. Novine Federacije BiH“, br. 19/98, 15/99, 32/99, 36/99, 48/99, 3/2000, 5/2000, 7/2000, 17/2000, 18/2000 i 38/2000, te Odlukom br. 01-02/4785/2000 od 13.10.2000. godine, UO Agencije za privatizaciju u Federaciji BiH. Sastavni dio Rješenja čini Izvještaj o izvršenoj reviziji pretvorbe i privatizacije GP „Vranica“ d.d. Sarajevo.

Rješenje i Izvještaj dostavljeni su svim relevantnim subjektima iz člana 17. zakona o reviziji privatizacije državnog kapitala u privrednim društvima i bankama u Federaciji Bosne i Hercegovine, kojima je shodno navedenom članu Zakona ostavljen rok od 15 dana za eventualno ulaganje žalbe na navedeno Rješenje. Po protoku ostavljenog roka, utvrđeno je da nije pristigla niti jedna žalba na predmetno Rješenje, te je Rješenje postalo pravosnažno.

## **2. Privredno društvo „BNT Kovačnica“ Novi Travnik**

Dana, 19.05.2016. godine, shodno Zakonu o reviziji privatizacije u F BiH i usvojenom Planu rada Agencije za 2016. godinu, doneseno je Rješenje, broj gornji, o pokretanju postupka revizije privatizacije „BNT Kovačnice“ d.d. Novi Travnik. Za vođenje postupka revizije i sačinjavanje Izvještaja o izvršenoj reviziji pretvorbe i privatizacije, Odlukom br. 01-02-1-150-1/16 od 19.05.2016. godine, imenovani su ovlašteni revizori. Rok za izradu Nacrta izvještaja o izvršenoj reviziji pretvorbe i privatizacije „BNT-Kovačnice“ Novi Travnik, bio je 29.07.2016. godine.

U vremenskom periodu od donošenja predmetnog Rješenja i pokretanja postupka revizije revizori su se konstantno susretali sa poteškoćama oko prikupljanja dokumentacije neophodne za izradu Nacrta izvještaja. Situacija je dodatno usložnjavana i uskraćivanjem dostave dokumentacije od strane nadležne Agencije za privatizaciju, u ovom slučaju Kantonalne agencije za privatizaciju SBK. I pored štire dokumentacione osnove za izradu izvještaja, te nedostatka volje nadležnih subjekata za dostavu iste, revizori su se ipak upustili u izradu istog kako bi bio ispoštovan prethodno usvojeni Plan rada Agencije za 2016. godinu, kao i Zakonske odredbe po kojima je Agencija i uposlenici iste dužni postupati. Uprkos jasnim zakonskim odredbama iz člana 12. Zakona o reviziji privatizacije u F BiH, nadležna Agencija za privatizaciju je tek nakon nekoliko bezuspješnih pokušaja i pismenih zahtjeva odobrila revizorima Agencije za reviziju privatizacije u F BiH, uvid u dokumentaciju o privatizaciji „BNT – Kovačnica“ d.o.o. Novi Travnik. Tom prilikom revizori su izuzeli veći dio dokumentacije koji je posjedovala pomenuta Agencija, odnosno dokumentacije koja je revizorima stavljena na uvid. Međutim, prilikom razvrstavanja i analize izuzete dokumentacije utvrđeno je da u istoj nedostaje slijedeća dokumentacija:

- Izvještaj i Rješenje o izvršenoj prethodnoj vlasničkoj transformaciji, koje je sastavni dio Početnog bilansa, shodno članu 6. Zakona o privatizaciji preduzeća i banaka u FBiH.
- Spisak stanova kojima je preduzeće raspolagalo, shodno članu 16. Zakona o početnom bilansu. U neutralnom bilansu je samo iskazana vrijednost ulaganja u popravku stanova vlasništvo BNT Holding, što znači da su isti postojali.
- Sumnjiva i sporna potraživanja u iznosu od 247.137,16 KM pod stavkom Ostalo – tabela 5 početnog bilansa. Nedostaje informacija o tome da li je BNT dostavio, tj. da li je tražena ikakva potvrda pokušaja naplate istih (sudski sporovi, opomene itd),
- Procjena sudskog vještaka za zemljište, obzirom da je vrijednost kapitala povećana za 5.911.218,20 KM, na osnovu knjiženja povećanja vrijednosti zemljišta za navedeni iznos, te
- Prilozi uz Program privatizacije (obzirom da dostavljeni Program nema priloga koji su naznačeni u istom).

Povodom naprijed nabrojane dokumentacije koja nedostaje, a koja je neophodna za izradu revizorskog izvještaja, Zahtjevom br. 02-19-1-154-5/16 od 08.07.2016. godine i Urgencijom br. 02-19-1-154-6/16 od 08.08.2016. godine, obratili smo se Kantonalnoj agenciji za privatizaciju SBK radi dostavljanja navedene dokumentacije. Međutim, do dana sačinjavanja ove Informacije, nismo zaprimili traženu dokumentaciju, kao ni zvaničan stav navedene Agencije da traženu dokumentaciju ne posjeduje.

Slijedom naprijed navedenog, a imajući u vidu činjenicu da se radi o dokumentaciji koja je neophodna za izradu Izvještaja, usljed nedostatka iste, revizori nisu u mogućnosti izraditi revizorski izvještaj o pretvorbi i privatizaciji „BNT-Kovačnica“ d.o.o. Novi Travnik, niti dati konačnu na Zakonu zasnovanu ocjenu postupka pretvorbe i privatizacije navedenog privrednog društva.

\*\*\*

Pored revizije privatizacije naprijed navedenih privrednih društava, u Agenciji su tokom 2016. godine, preduzimate i druge aktivnosti povodom revizijskih postupaka pokrenutih u toku 2015. godine, posebno vezano za reviziju privatizacije privrednog društva „Dita“ d.d. Tuzla.

## **REVIZIJA BANAKA**

U skladu sa Zakonom o reviziji privatizacije državnog kapitala privrednih društava i banaka ( „Službene novine FBiH“, broj 55/12; u daljem tekstu: Zakon), Agencija ima obavezu dostavljati Informaciju o izvršenim revizijama privatizacije državnog kapitala privrednih društava i banaka u skladu sa članom 13. Zakona.

Iako, dostavljena Informacija ima puni naziv u skladu sa Zakonom, moramo istaći da nismo vršili reviziju banaka, jer usvojeni Plan rada za 2016. godinu nije obuhvatao banke, iz razloga što Agencija trenutno nema zaposlenog revizorskog osoblja za banke, odnosno revizora koji bi radili na reviziji banaka kako je i planirano unutrašnjom organizacijom i sistematizacijom radnih mjesta u Agenciji.

## **FAKTORI USPJEHA RADA I RIZICI**

Napominjemo da se Agencija svakodnevno susreće sa poteškoćama u smislu sprovedbe Zakona o reviziji privatizacije. Obzirom da je Zakon donesen 2012. godine, a da je njegova praktična primjena počela tek u martu mjesecu 2015. godine (otvaranjem postupka revizije privatizacije „Dita“ d.d. Tuzla), u postupku revizije i primjene Zakona uočene su određene nejasnoće i neusklađenosti Zakona sa drugim općim zakonima u Federaciji Bosne i Hercegovine. S tim u vezi u predhodnom periodu u više navrata tražili smo tumačenje pojedinih odredbi Zakona.

Na osnovu člana 14. Zakona, Agencija je dužna provesti postupak revizije u svim privrednim društvima i bankama, najkasnije u roku od 5 (pet) godina od dana stupanja na snagu ovog Zakona. Imajući u vidu da je Agencija formalno (registracija kod porezne uprave i statistike) počela sa radom u junu mjesecu 2014. godine, tj. 2 (dvije) godine nakon stupanja na snagu Zakona, samim tim rok za završetak svih revizija zapravo je 3 (tri), a ne 5 (pet) godina. S obzirom da je broj privrednih društava i banaka koje Agencija treba da revidira znatno veliki taj rok je veoma kratak za uspješno obavljanje svih revizija. Iako su domovi Parlamenta Federacije Bosne i Hercegovine, naložili Vladi Federacije Bosne i Hercegovine da pristupi izmjenama Zakona o reviziji privatizacije privrednih društava i banaka, još uvijek nikakve aktivnosti nisu poduzete za realizaciju donesenih Zaključaka.

## **ZAKLJUČAK**

Uspostavljanje Agencije za reviziju privatizacije i njena Zakonom i aktima Vlade Federacije Bosne i Hercegovine definisana djelatnost ima važnu ulogu u ostvarenju ciljeva ulaska u evropske integracije.

Agencija za reviziju privatizacije je u potpunosti posvećena da izvrši sveobuhvatnu reviziju privatizacije na profesionalan i odgovoran način, na načelima dosljedne primjene Zakona, uputa i odluka Vlade Federacije Bosne i Hercegovine, transparentnosti u radu i otvorenosti za sve institucije i stručnu javnost, ali i primjerenog pravnog okruženja, te adekvatnog provođenja aktivnosti nadležnih institucija kako bi ostvarila uspješan rad i strateške ciljeve.

Kada se uzme u obzir obimnost poslova revizije pretvorbe i privatizacije i njena multidisciplinarnost, može se konstatovati da su u izvještajnom periodu urađene dvije veoma zahtjevne revizije, te pokrenuta treća revizija, što znači da se na jednoj reviziji radilo dva i pol mjeseca u prosjeku, što je više nego zadovoljavajuća dinamika rada,

kada se uzme u obzir da Agencija trenutno vrši reviziju privatizacije sa dva ovlaštena revizora za privredna društva.

**Broj: 01-05-1-293/16**

**Sarajevo, 09.09.2016. godine**

**DIREKTOR**

Vedad Duraković, dipl.ecc.